

ازاي يا غريب؟!



يا غريب مش حمل الغربة
ولا ضهرك يتحمل بُعد
ما تسيبش حبالك ولا ترحل
وتتشدّ اوتادك.. من سابع أرض
وتروح على دنيا
هاتدبّل.. في عينيك كالورد
يا غريب..
عايش بالطول والعرض
بتجمّع فراغيت الذكرى
مع حلم بيجري

ورايح على بكرة
بيعد الأيام بالخطوة
اللي بتنزف بين فرح وهم
يا غريب مش غاوي الغربية
طبطب على روحك كمل
واثبتت من غير أسباب
من غير براهين
ولا تسأل للدنيا سؤال
متعّم ومالهش جواب
ولا ترمي حبالك لإيدين رحال
وتبدّل صلصالك طين
تتجمّد روحك.. تصبح تمثال
كان يشبه للبني آدمين

يا غريب كاسراه الغربية
البحر ببيلع أحلام الموج
ويصّحي الليل الشقيان
بيغمّض بالغصب عينيك
والروح بتهزّ صوابك
مش قادر تمسك أمانيك
وشعاع النور اللي ف عينك
وصّيه ليشدّ ف حيلك
ويتحمّل...
أحسن من إنه يبان معوج
ثبت عناوينك...
في عيون الناس الـ شايفينك
تضاريسك مش باين منها

لا سهول ولا حتى هضاب

واجمد...

إياك تتكاسل أو تهمد

أو ترمي جناحك كشريد

واخذاه الغربية ولبعيد

ورا أي سحب..

أو تزرع أرضك

بالبوص والغاب..

وتعيش شبه المطاريد

في الدنيا المنسيّة من أي حساب

يا غريب مغصوب ع الغربية..

ما تخافش الموت الحتمي

لو شعرك شاب..

اوعاك لا تسلّم قلبك

لمشاعر شيقانة

بين نار وعذاب

يا غريب في الدنيا المرمية

ف أحضان الجرح

وبتقطع أوراق الفرح

وف آخر أركان الدنيا بترميك..

يا غريب في الدنيا المبلية

بأحزان حوالبك

الغربة بتصنع أوطان

في خيال الميت قضبان..

شبه الجدران حوالبين الحلم

اللي كتير بيفسّر جّواك

كام مرة حسيت بالظلم

وكمّلت وفضّلت الصمت؟!!

وغطيت وداريت.. أو نمت

في قسّاك لسّاك

واقف تتفرّج على حلمك

مصلوب على كفّ إيديك

متحاصر بين ماضي وحاضر

وكأنك ديب..

بيفرّق ع الناس الرعب

أول ما بتطلع من جحر العتمة

الشمس ف وشك بتغيب

وكأنك ذنب..

فى ضمير اتمرّد رافض حتى التائب

أو عايش عاصي.. في عقيدة كافر

بالغصب تهاجر.. يا تسافر

ياتعيش كأسير الحرب

اللى بعافر بين الكرايب

يا غريب...

جوّاك الرحلة طويلة

طولة ليل المظالم

أيامك.. أحلامك، وحصيرة العيلة

مفروشة على شط الغيم

في براح العالم متبعتر

بتشيل الشيلة

وكأنك مولود من صغره يتيم

بيعبّي الأحزان بالكيلة

متغرب في حوارى السوق
مش لاقى في الدنيا الراحة
ولا حتى ف عين الزمن المقلوب
على معنى الشوق...
بتحسنّ العالم وكأنه مناحة
على روح المتحير..
بين تحت وفوق
يا غريب.. مغلوب
وقالوها وبكل صراحة
كرهوك...
من غير ما يحسّوا رموك
في الوطن اللي مسجل اسمك
مملوك.. صعلوك

متحدّد رسمك

فى وشوش الناس الشقيانة

الماشيين ع الشوك

يا غريب...

مش باقي غير ربك

ولياي الصبر

اللي ف سيرة أيوب

متشقق جواك الرقيق

بقى يشبه جدران القبر

مش سامعك...

ساعة ما بتصرخ بحرارة العشق

ومش لاقى طريق

للناس اللي بتهدر دمك

وبتكسر قلمك

وتشقق في قلبك ١٠٠ شق

في ساعات بتفكر

مش عارف إذا كنت هاتقدر

أو ترمي آمالك في النار

وتخاف...

على روحك تتحول دخان

تشهق أنفاسك

من وسط دموع الأحزان

تتحسر

خائف...

على عمرك يتحول

لرماد وعفار

خائف...

على عمرك ليطير مع هدد الدار

فازاي يا غريب هاتتوب؟!!

ازاي يا غريب هاتتوب؟!!

خطاويك في الأرض بتتسمّر

لسّاك واقف ومشمّر

بتعاند في الريح والنار